

VENDIM
Nr.1703, datë 24.12.2008

PËR VENDOSJEN E STANDARDEVE TË SHËRBIMEVE DHE TË VEPRIMTARIVE
SEZONALE/TË PËRKOHSHME, PËR MINISTRITË DHE INSTITUCIONET BUXHETORE

Në mbështetje të nenit 100 të Kushtetutës dhe të pikës 2 të nenit 18 të ligjit nr.7961, datë 12.7.1995 “Kodi i Punës i Republikës së Shqipërisë“, të ndryshuar, me propozimin e Ministrit të Financave, Këshilli i Ministrave

VENDOSI:

1.Veprimtaritë sezonale/të përkohshme, që kryejnë ministrinë dhe institucionet buxhetore gjatë veprimtarisë së tyre vjetore, vlerësohen si shërbime dhe realizohen me sipërmarrje, duke zbatuar legjislacionin në fuqi për prokurimin e tij si shërbimet e tjera normale.

2.Kur veprimtaritë sezonale/të përkohshme nuk mund të realizohen me sipërmarrje apo nga punonjësit e miratuar në organikën e ministrisë/institucionit buxhetor, mund të realizohen, nëpërmjet marrjes në punë të punonjësve, me kontratë të përkohshme.

Ministritë/institucionet propozojnë marrjen e punonjësve shtesë, me kontratë të përkohshme, jashtë numrit të punonjësve buxhetorë të miratuar. Kërkesa i dërgohet Ministrit të Financave, i cili pasi e shqyrton, e dërgon në Këshillin e Ministrave. Miratimi i punonjësve me kontratë të përkohshme, bëhet vetëm me vendim të Këshillit të Ministrave.

3.Për efekt të këtij vendimi, punonjës me kontratë të përkohshme pune vlerësohen ata punonjës, të cilët kryejnë një veprimtari:

-sezonale;

-të domosdoshme, por që realizohet në një periudhë kohore të shkurtër, jo më shumë se 6 muaj;

-të reduktuar, me kohë të pjesshme ditore pune, që mund të shtrihet gjatë të gjithë vitit buxhetor;

- dytësore, të institucionit, dhe që paguhet nga të ardhurat e kësaj veprimtarie.

4.Për efekt të këtij vendimi, nuk vlerësohen punonjës me kontratë të përkohshme pune mësuesit në dispozicion, në sektorin e arsimit, dhe instruktorët, me kohë të pjesshme, në shkollat e formimit profesional.

5.Për efekt të këtij vendimi, nuk do të vlerësohen dhe trajtohen si punonjës me kontratë ekspertët e fushave të ndryshme, të licencuar. Shërbimi i ofruar prej tyre u nënshtrohet procedurave përkatëse të prokurimit publik apo akteve të veçanta ligjore, në fuqi.

6.Punonjësi me kontratë të përkohshme paguhet në përputhje me vendimin përkatës të Këshillit të Ministrave, për pozicionin, për të cilin ai kontraktohet dhe merret në punë, në përputhje me kriteret e parashikuara për atë vend pune.

7.Çdo propozim i ministrive/institucioneve qendrore për punonjës me kontratë të përkohshme shoqërohet me të dhëna të hollësishme për numrin, profesionin, afatin kohor të kontraktimit (muaj ose ditë ose orë/ditë) dhe pagesën përkatëse.

8.Ministria e Financave, pas miratimit nga Këshilli i Ministrave të numrit të punonjësve me kontratë të përkohshme dhe detajimit të tyre nga institucionet përkatëse, e depoziton dokumentacionin përkatës në degët e thesarit. Degët e thesarit lejojnë kryerjen e pagesës për punonjësit me kontratë të përkohshme dhe sipas periudhës kohore të përcaktuara në kontratë.

9.Fondet e nevojshme financiare për veprimtarinë sezonale ose të përkohshme të përballohen nga buxheti i miratuar për ministrinë apo institucionin, buxhetor, si më poshtë vijon:

-Për veprimtarinë sezonale ose të përkohshme, sipas pikës 1 të këtij vendimi, nga shpenzimet operative dhe të mirëmbajtjes;

-Për veprimtarinë sezonale ose të përkohshme, sipas pikës 2 të këtij vendimi, nga shpenzimet për personelin (nga fondet e kushtëzuara ose të pakushtëzuara të miratuara në ligjin përkatës të buxhetit).

10.Ngarkohet Ministria e Financave për zbatimin e këtij vendimi.

Ky vendim hyn në fuqi menjëherë.

KRYEMINISTRI
Sali Berisha